



Adresa: **Ul. Hamdije Čemerlića 39 a**
71000 Sarajevo
<http://www.voda.ba>

tel. +387 33 726-444
fax. +387 33 726-423
e-mail: info@voda.ba

Broj: **UP-1/21-1-40-243-4/24**
Datum: **04.07.2024. godine**

«Agencija za vodno područje rijeke Save» Sarajevo rješavajući po zahtjevu JP Nacionalni park Una, za izdavanje prethodne vodne saglasnosti za rekonstrukciju postojeće putne komunikacije Čelije – Štrbački Buk, na osnovu člana 12. stav (1) tačka 1. i člana 109. stav (1) tačka 9. Zakona o vodama («Službene novine Federacije BiH», broj 70/06) i člana 200. stav 1. Zakona o upravnom postupku («Službene novine Federacije BiH», broj 2/98, 48/99 i 61/22), donosi:

RJEŠENJE **o prethodnoj vodnoj saglasnosti**

1. Daje se prethodna vodna saglasnost JP Nacionalni park Una, za rekonstrukciju postojeće putne komunikacije Čelije – Štrbački Buk, u Nacionalnom parku Una, na zemljištu označenom kao k.č. broj: 222/22, 222/23, 222/64, 222/75, 251, 252, 253, 222/3, 222/4 i 222/5, K.O. Klišević, i k.č. broj: 622/20, 622/21, 622/22, 923, 924/2, 926, 924, 855, 874/1, 874/2, 873/2, 872, 859, 860/12, 860/11, 860/9, 860/10, 861/6, 860/8, 873/16, 873/11, 873/13, 873/15, 873/20, 860/10, 860/16, 860/17, 860/18, 867/1 i 867/2 K.O. Doljani, (prema popisnom katastru) a u postupku pribavljanja urbanističke saglasnosti. Ova prethodna vodna saglasnost odnosi se isključivo na dionice postojeće putne komunikacije locirane u vodnom dobru i poplavnom području vodotoka I kategorije.
2. Ova prethodna vodna saglasnost ne oslobađa podnosioca zahtjeva obaveze pribavljanja prethodne vodne saglasnosti za izgradnju lokalnih saobraćajnica, za čije izdavanje je nadležno Ministarstvo poljoprivrede, vodoprivrede i šumarstva Unsko-sanskog kantona, u skladu sa članom 17. stav 2. tačka (7). Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH», broj 31/15, 55/19, 41/20 i 63/22) kao i saglasnosti i dozvola od strane drugih nadležnih organa u skladu sa drugim Zakonima i podzakonskim propisima.
3. Prethodna vodna saglasnost se daje na osnovu pregleda dostavljene dokumentacije, utvrđenog činjeničnog stanja i pod slijedećim uslovima:
 - 3.1. Izraditi i revidovati investiciono-tehničku dokumentaciju na nivou glavnog projekta, u skladu sa članom 5. stav (2) Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH», broj 31/15), a sve u skladu s propisima za ovu vrstu radova koji su predviđeni za gradnju u vodnom dobru.
 - 3.2. Investiciono-tehnička dokumentacija treba biti urađena i revidovana od strane ovlaštenih pravnih lica (**lista A**) shodno Pravilniku o uvjetima i kriterijima koje mora ispunjavati pravno lice za izradu dokumentacije na osnovu koje se izdaje vodni akt («Službene novine Federacije BiH», broj 17/08).
 - 3.3. Pri izradi tehničke dokumentacije pridržavati se pravila struke i nauke te zakonske regulative vezane za ovakvu vrstu radova, te ekološko-ekonomskih zahtjeva.
 - 3.4. Predmetna trasa putne komunikacije mora biti usklađena sa prostorno planskom dokumentacijom i razvojnim planovima grada Bihaća za predmetno područje, odnosno mora biti usklađena sa odredbama Prostornog plana područja posebnih obilježja od značaja za Federaciju BiH „Sliv rijeke Une“ 2007-2027.
 - 3.5. Projektnom dokumentacijom dati tehničko rješenje rekonstrukcije postojeće putne komunikacije sa svim potrebnim proračunima i tehničkim opisom kao i situativni prikaz trase, tačan položaj objekata putne komunikacije u odnosu na vodotoke, vodno dobro, poplavno područje, linije velikih voda ranga pojave jednom u sto godina, planirane objekte za zaštitu od voda i zaštitne zone izvorišta vode za piće.
 - 3.6. U cilju efikasne odvodnje oborinskih voda sa saobraćajnica i voda iz zaleđa, potrebno je predvidjeti na ulaznim građevinama propusta ispod saobraćajnice odvajanje taloživih materijala i krupnog otpada koji doprinoseći akumulaciji...

- 3.7. Projektnom dokumentacijom treba definisati način prikupljanja i ispuštanja oborinskih voda sa saobraćajnice u skladu sa propisanim graničnim vrijednostima emisija otpadnih voda u okoliš u članu 14. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 1/24), kao i prihvatanje i transport vanjskih (brdskih) voda sa gravitirajućih slivnih površina.
- 3.8. U sklopu projekta treba dati hidrološki proračun kojim će se definirati količine vode koje se mogu pojaviti u formi oborina, povremenih ili stalnih površinskih tokova koje je potrebno regulisati, odnosno propustiti ispod trupa saobraćajnice (propusti i mostovi) i osigurati bezbjedno oticanje.
- 3.9. Odrediti niveletu planirane ceste u odnosu na velike vode rijeke Une i pritoka duž trase saobraćajnice kao i ostalih vodotoka čije velike vode potencijalno ugrožavaju trasu ceste na način da se ne dovodi u opasnost odvijanje saobraćaja u slučaju pojave velikih voda ranga 1/100 godina.
- 3.10. Sagledati sve moguće neželjene uticaje kako na planiranu dionicu saobraćajnice, tako i saobraćajnice na druge objekte i postrojenja, korito rijeke, stečena prava korisnika, postojeću infrastrukturu, naselja i slično, te dati prijedlog mjera za sprječavanje ili smanjenje tih uticaja u toku radova na izgradnji ceste.
- 3.11. Prelaze preko postojećih vododerina i potoka riješiti putem mostovske konstrukcije ili propusta uz uslov da mostovni otvor preko potoka obezbjeđuje proticaje utvrđenih velikih voda $Q_{1/100}$ kao i da se poštuje nadvišenje od 1,00 m od donje ivice mostovne konstrukcije, uzimajući u obzir pojavu uspora od velikih voda rijeke Une. Za propuste ispod saobraćajnice je mjerodavan kriterij u pogledu hidrauličkog kapaciteta, da trebaju propustiti velike vode ranga pojave jednom u sto godina sa slobodnim prostorom iznad nivoa velike vode od 25% od površine otvora propusta.
- 3.12. U slučaju eventualnog prolaska trase saobraćajnice kroz vodozaštitne zone, posebnu pažnju obratiti da se poduzmu adekvatne mjere zaštite. Rješenje saobraćajnice na takvim prostorima treba dati tako da se tokom građenja i korištenja iste ne naruši kvalitativno – kvantitativni režim izvorišta.
- 3.13. Potrebno je predvidjeti adekvatno osiguranje ulivne i izlivne glave propusta projektovanih propusta. Konstruktivne elemente propusta prilagoditi morfološkim i geološkim karakteristikama terena te specifičnostima vodotoka u koji se upuštaju vode iz propusta.
- 3.14. U projektnoj dokumentaciji definisati lokalitete – pozajmišta materijala sa kojih će se dovoziti materijal za trup ceste, odnosno lokalitete na kojima će se deponovati višak materijala. Nije dozvoljeno deponovanje materijala uz obale vodotoka i u vodnom dobru. Deponovanje materijala rješavati na način da se ne remeti prirodni režim voda.
- 3.15. Rekonstrukciju postojeće putne komunikacije izvesti prateći postojeću trasu makadamskog puta te predvidjeti sprečavanje svih negativnih posljedica utjecaja voda (ispiranje/podlokavanje tupa i bankine puta, narušavanje stabilnosti obale, i sl.), u protivnom sve posljedice će snositi podnosilac zahtjeva.
- 3.16. Rekonstrukcija postojećeg makadamskog puta treba da bude usklađena sa ostalom infrastrukturom (elektro, gasovodi, vodovod, telefon i sl.), a za sve eventualne kolizije i ukrštanja sa istom, treba se pribaviti saglasnost sa vlasnikom infrastrukturnih objekata ili organizacijom koja njime upravlja te istu izvesti u skladu sa propisanim urbanističko-tehničkim uslovima.
- 3.17. Tehnologiju izvođenja iskopa, nasipa kamenog materijala te nabijanja istog pri vršenju rekonstrukcije postojeće putne komunikacije izabrati sa posebnom pažnjom kako ne bi došlo do poremećaja okolnog tla te narušavanja obalnog područja rijeke Une.
- 3.18. Materijal iz iskopa i građevinski otpadni materijal se ne smije privremeno niti trajno odlagati na prostoru vodnog dobra, odnosno u korita i na obale vodotoka.
- 3.19. Definirati način prelaska ceste preko lokalnih potoka i vododerina te način zaštite stabilnosti obale na dionicama gdje se trasa približava obali rijeke Une ili nalazi na istoj.

- 3.20. Projektnom dokumentacijom sagledati sve moguće neželjene uticaje, kako na planirane objekte putne infrastrukture (trup ceste, ivičnjaci, potpori zidovi, bankine, i sl.) tako i planiranih objekata na druge objekte i postrojenja, stečena prava korisnika, zaštitne zona izvorišta vode za piće, naselja i sl. i dati prijedlog mjera za uklanjanje odnosno sprečavanje tih uticaja.
4. Ovu prethodnu vodnu saglasnost će Investitor koristiti u postupku pribavljanja okolinske dozvole odnosno urbanističke saglasnosti i ona definiše sve uslove koje Investiciono-tehnička dokumentacija treba ispuniti za pribavljanje vodne saglasnosti, a sve u skladu sa Zakonom o vodama i provedbenim dokumentima (Pravilnik o sadržaju, obliku, uslovima, načinu izdavanja i čuvanja vodnih akata, Uredba o uslovima ispuštanja otpadnih voda u okoliš i sisteme javne kanalizacije).
5. Po izradi investiciono-tehničke dokumentacije, u skladu sa uslovima iz tačke 3. dispozitiva ovog Rješenja, korisnik prethodne vodne saglasnosti dužan je da ovoj Agenciji podnese zahtjev za izdavanje vodne saglasnosti na izrađenu projektnu dokumentaciju.
6. Zahtjev za izdavanje vodne saglasnosti dostavlja se u skladu sa članom 8. i 19. stav (2) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj 31/15, 55/19, 41/20 i 63/22).
- Uz zahtjev se prilaže :
- 6.1. Revidovana Investiciono-tehnička dokumentacija urađena u skladu sa uslovima iz dispozitiva ovog rješenja.
- 6.2. Rješenje o urbanističkoj saglasnosti za izgradnju predmetnog objekta.
- 6.3. Rješenje o okolinskoj dozvoli ili potvrda nadležnog organa da ista nije potrebna.
- 6.4. Dokaz o izvršenoj uplati administrativne takse u iznosu od 60 KM.
7. Ova prethodna vodna saglasnost se daje sa rokom važenja od 3 (tri) godine od od dana pravosnažnosti ovog rješenja, u skladu sa članom 111. stav 3. Zakona o vodama i ista prestaje da važi ukoliko ne bude pribavljena urbanistička saglasnost i ne bude podnesen zahtjev za izdavanje vodne saglasnosti.
8. Ukoliko nakon izdavanja ove prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavijestiti ovu Agenciju, odnosno kantonalno ministarstvo, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.
9. Ovo rješenje o prethodnoj vodnoj saglasnosti može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Investitor JP Nacionalni park Una, obratio se ovoj Agenciji, dana 20.05.2024. godine zahtjevom za izdavanje prethodne vodne saglasnosti za rekonstrukciju postojeće putne komunikacije u Nacionalnom parku Una, a u postupku pribavljanja urbanističke saglasnosti.

U provedenom postupku, uz zahtjev za izdavanje prethodne vodne saglasnosti dostavljena je i pregledana slijedeća dokumentacija:

- Kopija situacije terena u mjerilu 1:2500, broj 03/1-19-1-3707/23,
- Kopija Izvoda iz prostorno – planske dokumentacije predmetne aktivnosti izdata od strane Grada Bihaća pod brojem: 03/1-19-1-3707/23, dana 16.05.2024. godine, u Bihaću,
- Ovjerena kopija Uvjerenja o poreznoj registraciji, izdato od strane Federalnog ministarstva finansija – Porezne uprave Federacije BiH – Kantonalnog poreznog ureda Bihać, od 08.02.2022. godine,
- Ovjerena kopija Uvjerenja o registraciji/upisu u Jedinstveni registar obveznika indirektnih poreza, izdano od strane Uprave za indirektno-neizravno oporezivanje pod brojem 04/1-17-1-UPJR/1-580-2/22, dana 01.03.2022. godine,

- Aktuelni izvod iz Sudskog registra ovjerena kopija, izdan od strane Općinskog suda u Bihaću matični broj upisa 17-05-0001-09, dana 07.05.2024. godine,
- Identifikacija parcela preko kojih prelazi trasa puta Čelije – Štrbački Buk. Obavijest da je na snazi popisni katastar; Izradio geometar Azran Kuduzović dana 04.12.2023. godine, sa izvodima iz Posjedovnih listova broj: 18, 35, K.O. Klišević Bihać i iz Posjedovnih listova broj: 151, 204, 154, 153, 53, 42, 40, 39, 44 i 50 k.o. Doljani Bihać,
- Odgovor Agencije za vodno područje rijeke Save broj 10/40-120-2/24 od 31.01.2024. godine,
- „Studija za dobivanje prethodne vodne saglasnosti za legalizaciju i rekonstrukciju postojeće putne komunikacije Čelije - Štrbački Buk sa regulacijom oborinskih voda“, izrađena od strane „Instituta za hidrotehniku Sarajevo“ d.d. Sarajevo, maj 2024. godine,
- Uplatnica upravne pristojbe.

Nakon izvršenog uvida u dostavljeni zahtjev i priloženu dokumentaciju utvrđeno je da je u skladu sa članom 124. stav 1. Zakona o vodama («Službene novine Federacije BiH», broj 70/06) o zahtjevu je dana 04.06.2024. godine, obaviještena javnost putem obavještenja na oglasnoj ploči «Agencije za vodno područje rijeke Save» Sarajevo i u Uredu u Bihaću i putem oglasa u dnevnom listu Oslobođenje. U datom roku nije bilo pisanih izjašnjenja o predloženim aktivnostima iz zahtjeva.

Na osnovu uvida u dostavljenu dokumentaciju utvrđeno je sljedeće:

Rekonstrukcija postojeće putne komunikacije je predviđena u dužini 2720,34 metara, koji povezuje naselje Čelije sa vodopadom rijeke Une Štrbački Buk. Početak trase je u naselju Čelije na postojećoj asfaltiranoj dionici puta. Predviđena je širina kolovoza 3 metra, a predviđeni su i rigoli i bankine 2 x 0,5 metra obostranom te oivičenje ivičnjacima 18/24 cm.

Nakon uvida u dostavljenu dokumentaciju konstatovano je da sa aspekta sektora voda i priložene dokumentacije ne postoje zapreke da se podnosiocu zahtjeva, izda tražena prethodna vodna saglasnost.

Uslovi za izdavanje vodne saglasnosti definisani su u tački 3. dispozitiva Rješenja i isti trebaju biti obrađeni u investiciono-tehničkoj dokumentaciji koju će Investitor dostaviti uz zahtjev za izdavanje vodne saglasnosti, shodno članu 114. Zakona o vodama.

Na osnovu prednjeg i provedenog postupka, a shodno članu 111. Zakona o vodama i člana 5. Pravilnika o sadržaju, obliku, uslovima, načinu izdavanja i čuvanja vodnih akata doneseno je rješenje kao u dispozitivu.

Podnosilac zahtjeva je uplatio upravnu pristojbu u iznosu od 80 KM u skladu sa Zakonom o izmjenama i dopunama Zakona o federalnim upravnim taksama i tarifi federalnih upravnih taksi («Službene novine Federacije BiH» broj: 06/98, 8/00, 45/10 i 43/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obrađivač akta:

Fuad Mujagić, dipl. inž.



Po ovlaštenju

Rukovodilac sektora za izdavanje
vodnih akata

Nihad Pezo
Nihad Pezo, dipl.inž.građ.

Dostaviti:

- JP Nacionalni park Una d.o.o. Bihać, Bosanska 17D, 77 000 Bihać,
- Služba za urbanističko planiranje i građenje Grada Bihaća, Bosanska 4, 77 000 Bihać,
- Ⓢ AVP Sava, ISV-vodna knjiga
- Sektor 40 – arhiva
- Oglasna ploča AVP Sava